

**FUAFUAGA TATAU MO LE VA'AIA
LELEI O I'A MA FIGOTA
O le Afioga o**

SAFAATOA LEFAGA

(Tusia Aso 10 Tesema 1997)

Saunia:

Tagata o le afioga o Safaatoa ma le Lagolagosua a le Vaega o Faigafaiva o le Matagaluega o Faatoaga ma Faigafaiva.

FAASOLOGA

- 1. UPU TOMUA**
 - 1.1 Sui Filifilia o le Komiti
- 2. FAAMATALAGA E UIGA I LE AFIOAGA**
 - 2.1 Faamatalaga o foliga vaaia faa-natura o le Afioga
- 3. TULAFONO I ASO UA MAVAE MA ASO NEI (Gataifale ma Faigafaiva)**
 - 3.1 Aotelega o Tulafono o Faigafaiva: Aso ua mavae ma Aso nei
- 4. O LENEI FUAFUAGA TATAU**
 - 4.1 Autu
 - 4.2 Tapenaga
- 5. FUAFUAGA FAATAATITIA AFIOAGA**
 - 5.1 Tulafono faale-nuu: Faasaina Faigafaiva le talafeaga
 - 5.2 Ia Faasalalauina tulafono a le Afioga
 - 5.3 Ia Faasaina Upega ma Tili mataninii
 - 5.4 Ia Faasaina Tuiga ma Faamoa mo le faateleina o Amu
 - 5.5 Ia Aoina mai i uta Alamea ma faatamaia ai
 - 5.6 Ia Faasaina ona toe lafoai lapisi i le Matafaga ma le Sami
 - 5.7 Ogasami Faaasaina
 - 5.8 Tufaina atu ma Faafaatoagaina nisi figota
 - 5.9 Ia unaia faigafaiva i tuaau ma aoaoga mo faigafaiva
 - 5.10 Mana o Talosaga
- 6. TALOSAGA**
 - 6.1 Talosaga a le Afioga
- 7. TOE ILOILOINA O LENEI FUAFUAGA TATAU**

1. UPU TOMUA

O le faaitiitia o i'a ma figota i Samoa e afua mai i le anoanoai o mafuaaga eseese. O nisi o nei mafuaaga e aofia ai;

- le tanumia o vaega o le gataifale mo eleele-fou (fanua)
- le soona fagotaina faa-le-tatau o le gataifale e le afaifaiva
- le faaaogaina o faigafaiva-le-talafeagai
- ma aafiaga mai i afa malolosi (Ofa 1990, Val 1991, Heta 2004) ua tuanai.

O nei faafitauli o loo tulai mai pea i gataifale o si o tatou atunuu ma o loo avea lea ma auala e faaitiitia ai i'a ma figota. O le faaitiitia o nei tamaoaiga o le sami e faaitiitia ai foi porotini maua (protein) mo le taumafa tatau (taumafa paleni) mo tagatanuu o Samoa. O se atugaluga tele lea i le Malo o Samoa na faapea ai ona faatino nisi o fuafuaga faataatitia e pei ona faailoaina atu i lalo.

O le tausaga e 1988 na pasiaina ai e le Kapeneta le **Tulafono Autu Tau Faigafaiva** e faamalositia ai le (i) laiseneina o vaa-fagota mo fagotaga, (ii) faasaina le faia o faigafaiva-le-talafeagai i ogasami o Samoa. Peitai ane o nei tulafono uma e lei silafia e le toatele o tagatanuu o Samoa i ia vaitaimi. O se tasi o mafuaaga ona o le toaitiiti ma le toagaogao o le afaifaluga. Ae o seisi mafuaaga ua talitonu le taofi na faigata ona ausia ai lea tulaga ona e lei iai se polokalame i lea vaitaimi e pei o le Polokalame o le Faasao o le Gataifale mo Nuu ma Afioga. O leni polokalame e pei ona faatinoaina nei, ua fesoasoani tele i le faa-malamalamaina mo le silisfia e le mamalu o le atunuu o ia tulaga.

I le tausaga 1995 na pasiaina ai e le Kapeneta le **Tulafono Faatonutonu e Faatapulaaina ai le Laiti o I'a ma Figota**. O leni tulafono na pasiaina ma le faamoemoe e tuu avanoa ma fesoasoani i le faasao o i'a ma figota ua tauau ina mou atu. O le faatapulaaina o le laiti o i'a ma figota e faataga mo le fagotaina ina ia ausia le lapopoa ina ia mafai ona tautuufua ma fanafanau e faatupulaia ai le faitau aofai o le tamaoaiga o le gataifale. O loo faapipiina atu i le pito i tua o le Tusi Taiala se Pepa o Faamatalaga (6) mo faamatalaga faaopopo o leni tulafono.

O **Tulafono Laiti** a nuu ma afioga ua amanaia e le Faamasinoga. O se tasi lea o auala ua tuu sao ai e le Malo le malosi i nuu ma afioga e mafai ai ona o latou molia i le tulafono soo se tagata e le usitaia tulafono ua aiaia i totonu o le Tusi Taiala a le afioga o Safaatoa i Lefaga. O nei tulafono o loo i lalo o le vaega o Tulafono ma Faasalaga o le Tusi Taiala aua le pulea tatau ma le vaia lelei o le gataifale i tulaga o ona tamaoaiga ma lona siosiomaga mo se lumanai manuia. O tulafono laiti e soalaupuleina ma autasi iai le Pule Mamalu a Alii ma Faipule o afioga taitasi.

Polokalame o le Faasao o le Gataifale i Nuu ma Afioga

O le Polokalame o le Faasao na amataina e le Malo e tauala mai lea i le auaunaga a le Ofisa o Faigafaiva i le tausaga e 1995. I le amataga mai la o leni polokalame sa faapea ona lagolago malosi ai le Malo o Ausetalia e auala ma i lana AusAID i le faa-tupeina mo le 5 tausaga seia oo mai i le tausaga e 2000 ma faamuta ai loa lana fesoasoani. Peitai na e lei faamuta ai i lea tausaga ona sa tauaveina loa e le Malo o Samoa le faatupeina o leni polokalame taua. I le taimi nei, ua oo atu le aofaiga i le 85 nuu ma afioga ua faatinoaina ai leni polokalame. Peitai, mai i le 85 lea, e na o le 52 nuu ma afioga o loo tulai malosi ma faatauina pea leni polokalame. O le talitonuga ma le faamoemoe autu o le tele o nei afioga o le silasila lea i le lumanai manuia mo tagata lautele o le afioga aemaise ai o tupulaga lalovaoa.

O le polokalame o le Faasao e galulue soosoo-tauau iai le ofisa ma le afioga i nisi o fuafuaga faataatitia aua se lumanai manuia aemaise o le toe faa-tamaoaigaina o le gataifale. I le amataina o leni polokalame e faatinoaina ai ni faatalatalanoaga ma vaega eseese o le nuu e pei o le vasega o matai, tina ma taulelea. O nei fefaasoaiga e faailoa mai ai faafitauli o loo faafeagai ma le gataifale o le afioga. E talanoaina foi aafiaga ma mafuaaga o nei faafitauli ma soalaupule ai ni fofo. Ma sa faapea loa ona soalaupule ai e Alii ma Faipule, tagatanuu o le afioga ma le ofisa nisi o fuafuaga faataatitia e foia ai nei faafitauli. O se faataitaiga o se fuafuaga faataatia a le afioga i leni polokalame o le faia lea o se ogasami faasao e faasa ona solia, kolosina pe fagotaina foi.

O nisi o fuafuaga faataatitia e tele ona faaogaina e afioaga mo le pulea ma le vaia lelei o tamaoaiga (i'a ma figota) o le gataifale e aofia ai le faasaina o;

- vailaau oona
- fanaia
- ava-niu-kini
- tuiga, faamoa, seuga
- i'a ma figota laiti
- upega ma tili mataninii
- lama moli-uila i po

O nisi o fuafuaga o Tusi Taiala i le tele o afioaga mo le pulea tatau ma le vaia lelei o le siosiomaga o le gataifale e aofia ai le;

- aoina o alamea (crown-of-thorn starfish)
- faasaina o le lauina o le oneone o matafaga
- lafoai o lapisi i le gataifale (matafaga)

O lenei polokalame e taua tele mo le lumanai manuia o Samoa ma ona tagatanuu. O le faaleleia o le siosiomaga ma le faatuputupulaia o le tamaoaiga o le gataifale o se faamoemoe e talitonu e mafai ona faatinoina i o tatou lava lima. E faa-tauaina tele le lagolagosua a le Pule ma le Faamalumaluga a Alii ma Faipule o afioaga i lenei polokalame.

1.1 Sui Filifilia o le Komiti Faufautua

O le faatinoina o faatalatalanoaga ma komiti taitasi i totonu o le afioaga, e soalaupule ai manatu ma mataupu taitasi e le mamalu o le afioaga i ona vaega eseese. I lenei faatalatalanoaga e fefasoaa'i i fafitauli o feagai ma le afioaga, atoa ai ma le soalaupuleina o ni fofo o nei faafitauli. E le gata i lea ae faamautuina ai foi aiaiga uma mo le faamalosia o tulafono taitasi aua le alualu i luma ma le sologa lelei pea o le faasao a le afioaga. O le Komiti Faufautua, o i latou na ua filifilia e nafa ma le fautuaina o mataupu mo le vaia ma le sologa malie pea i luma o le Faasao a le afioaga.

A maea ona filifilia sui o le Komiti Faufautua, ona filifilia loa lea o sui o le komiti o le Faasao mai vaega e tolu sa faatalatalanoaina. E aofia ai ni sui se toatolu mai le Komiti a Matai, tolu mai le Komiti a Tina, ma le isi toatolu mai le Komiti a Aumaga poo taulelea.



2. FAAMATALAGA E UIGA I LE AFIOAGA

2.1 Faamatalaga o foliga vaaia faa-natura o le Afioaga

FAALAUATELE:

Faamatalaga:		
O le faitau aofai o tagatanuu o Safaatoa 3000 i le 4000.		
Tapuaiga i totonu o le Afioaga	Ekalesia Faapotopotoga Kerisiano i Samoa (EFKS)	2
	Faapotopotoga a le Atua i Samoa	1
	Aupaia o Aso e Gata ai	1
Fuaina o le umi o Safaatoa (mita) e tusa ma le 500 mita		
O le mamao o le aau mai le matafaga e 250 mita		
Na fuaina le loloto mo vaega aupito sili ona loloto o le aloalo pe a pe le tai i le taimi nei e 6 futu		
Na fuaina le loloto mo vaega aupito sili ona loloto o le aloalo pe a pe le tai a o lei afaina i afa ua tuanai e 8 futu		

FAIGAFIIVA:

Faamatalaga:
O le faitau aofai o tane fagogota i le sili atu ma le tasi le aso i le vaiaso e tusa ma le 100
O le faitau aofai o tina fagogota i le sili atu ma le tasi le aso i le vaiaso e 50 i le 60
O le aofaiga o tagata e fagogota i tuaau mai le tasi le aso o le vaiaso e 50
E 20 i le 30 paopao e faaaogaina mo faigafaiva i totonu o Safaatoa
E leai se alia fagota o faaaogaina mo faigafaiva a le afioaga o Safaatoa
E faatagaina soo se tagata mai isi alalfaga ona fagogota i le gataifale o Safaatoa

<u>Ituaiga I'a/FIGOTA</u>	<u>Faigafaiva</u>	<u>Taimi faaalu mo le tasi le tauia mo ofu (itula)</u>	
		Taimi nei	Tausaga ua tea
<i>I'a maua soo (5)</i>			
1. Alogo	Matatao	30 minute	15 minute
2. Pone	Fana	30 minute	15 minute
3. Lo	Lama	30 minute	15 minute

4. Mataaleelele	Mata	30 minute	15 minute
5. Sugale	Matatao	30minute	15 minute
Figota maua soo (3)			
1. Tuitui	Fao tuitui	30 minute	30 minute
2. Alili	Ao Alili/Lama	30 minute	30 minute
3. Sea	Tui sea	30 itula	2 itula

Isi Faigafaiva	Isi Taumafa o le sami	Taimi faaalu mo mea ua taua (itula)
1.		
2. Pa i'a	Tuitui (ato)	8 itula
3. Tili	Faisua	Seasea
4. Seuseu	Ula	1 i le 2 itula
5. Tosotoso	Paa (kuku)	1 i le 2 itula
6. Lama tipi	Sea	Aso atoa

NOFOAGA TAUA O LE SIOSIOMAGA MO FAIGAFAlVA:

<u>Nofoaga</u>	<u>Nofoaga taua (sikuea mita)</u>	
	Taimi nei	Sefulu tausaga ua tea
Togatogo Amu Vaovao o le sami	3 sikuea mita 100 i le 200 sikuea mita 50 sikuea mita	3 sikuea mita 200 sikuea mita Leai

3. TILAFONO I ASO UA MAVAE MA ASO NEI (Siosiomaga o le Gataifale ma Faigafaiva)

3.1 Aotelega o Tulafono o Faigafaiva:

Tulafono a le afioaga o Safaatoa i aso ua mavae.

Faasaina faigafaiva le talafeagai:

- Fanaia
- Ava niukini
- Vailaau oona

O nei tulafono sa faamamaluina ma amanaiaina e pei ona sa i ai i le taimi muamua i totonu o le afioaga o Safaatoa. Ae peitai e le o mamalu nei tulafono i nei vaitaimi ona o le le amanaiaina e nisi tagata o le afioaga atoa ai ma isi afioaga.

O nisi nei o mafuaaga:

- Leai se lagolago mai le Malo
- O nisi tagata o loo mafaufau na o le taimi nei ae le mo le lumanai aemaise ona tupulaga.

O nei mafuaaga uma o loo aafia i le Fuafuaga mo le Pulega o le Siosiomaga o le Gataifale ma le Vaai Lelei o i'a ma figota.

E le gafatia e le malosi faaetulafono a le Malo ona malu puipuia le siosiomaga o le gataifale ma ona tamaoaiga. E utiuti tulaga tau tupe ma toagaogao foi le afaigaluega a le Malo latou te faamalosia ma

unaia tulafono tau faigafaiva i nuu taitasi o Samoa. O le fofu talafeagai o loo i aao lava o le pule a Alii ma Faipule o le afioaga. O le a le pine ona unaia tagata latou te galulue faatasi ina ia malupuipua ma faaleleia le siosiomaga o le gataifale ma ona tamaoaiga mo nei ma tupulaga o le lumanai.

4. O LENEI FUAFUAGA TATAU

4.1 Autu:

O lenei fuafuaga ua taua ai ni faatinoga e manaomia ina ia maua ai sona taunuuga maumaututu. O le faamoemoe maualuga o le Malo ina ia faaleleia le soifua manuia o tagata o le afioaga, ma ia faatupulaia atili mea taumafa mai le sami. O lea e manaomia ai tagata uma ina ia avea nei faatinoga e puipua ai le siosiomaga o le gataifale ma ia fuafua tatau ai le fagotaina o i'a ma figota.

"Ina ia puipua le siosiomaga o le gataifale ma le toe faatupulaia o i'a ma figota mo tupulaga i le lumanai"

Na ioeina e le fonotaga a le Komiti o le Faasao i le Aso 4 Novema 1997, o le Komiti lava lenei latou te faamalosi ma unaia vaega eseese uma o le afioaga aua le puipua ma le faasaoina o atinae ma alamanuia o le gataifale o Safaatoa. O le Komiti foi lenei o loo nafa ma le tapenaina o tulafono aemaise o vaega uma e tatau mo lenei Tusi Taiala, atoa ai ma le tuuina atu i le pule mamalu a Alii ma Faipule mo le pasiaina. O lenei Tusi Taiala ua faamoemoe ia oo atu i le tolu tausaga o loo faaogaina pea, ae peitai afai ae iai se suiga e ao loa ona toe iloilo lenei Tusi Taiala.

4.2 Tapenaga:

O lenei tapenaga sa saunia lava e Alii & Faipule ma tagata lava o le afioaga o Safaatoa, faatasi ai ma ni fautuaga ma le lagolagosua a le Ofisa o Faigafaiva o le Matagaluega o Faatoaga ma Faigafaiva. O se oototoga lenei o le tapenaga a le Pulega o le Siosiomaga o le Gataifale ma le Vaia Lelei o i'a ma figota.

Feiloaiga Muamua:

O le feiloaiga muamua sa faafesootaia lea e Apulu Sefo Fonoti i le Aso 22 Aukuso 1997. O Setema i lona aso 12 sa tauaofia ai le uluai fono a sui o le Ofisa ma le Afioaga mo le faamalamalamaina ma le taliaina o lenei polokalame.

Vaevaeina o Vaega:

Sa vaevaeina le afioaga i vaega e aofia ai Matai, Tina ma Taulelea. Sa feiloai vaega taitasi ma sui o le Ofisa o Faigafaiva, ma faatalatalanoaina loa faafitauli o loo o loo aliae i le gataifale o le afioaga atoa ai ma ni fofu talafeagai e foia ai nei faafitauli.

Komiti Faufautua:

O lenei Komiti o loo aofia ai sui sa filifilia mai vaega taitasi. O le Komiti Faufautua lenei e galulue faatasi ma Ofisa o Faigafaiva i le saunia ma le tapenaina o se ata faataitai o le Tusi Taiala. O lenei ata faataitai o le Tusi Taiala o loo tuufaatasia ai faamaumauga ma faamatalaga mai vaega taitasi. O lenei foi Tusi Taiala o loo aafia ai lagona o tagata o le afioaga i le puleaina o Faigafaiva ma le siosiomaga o le gataifale. Afai ae mautu, ona tuuina atu lea i le fono a matai mo ni fautuaga ma le pasiaina.

Tauaofiaga o le Fono Tele:

Sa tauaofia lenei Fono i le Aso 10 Tesema 1997 mo le taliaina, fautuaina atoa ai ma se teuteuga o le fuafuaga muamua o le Faasao ma le Vaia Lelei o i'a ma figota. O le a filifilia foi se Komiti mo le Vaia Lelei o i'a ma figota.

5. FUAFUAGA FAATAATITIA A LE AFIOAGA:

O fuafuaga faataatitia o ni gaoiga faatino ua faia ina ia foia ai faafitauli ua faailoa mai e vaega eseese o le afioaga. E lua (2) ituaiga fuafuaga faataatitia:

(i) ua fuafuaina e faatino e le afioaga

(ii) fuafuaga e faatinoina e le Ofisa o Faigafaivataua

O nei fuafuaga o le a tuuina atu ai fautuagama fesoasoani i le tapenaina o le Tusi Taiala.

O fuafuaga faataatitia luma a le Ofisa o Faigafaiva e ao ona faamaonia muamua e le Faatonu Lagolago o Faigafaiva (ACEO) a le Matagaluega o Faatoaga ma Faigafaiva. O nei fuafuaga uma ua faamoemoe lo latou faataunuaina i le lagolagosua mai a le afioaga ma ona tagatanuu. O le a faaauau pea ona tuuina atu ni fesoasoani i le afioagae ala i pepa o faamatalaga atoa ai ma le faia o ni mafutaga faaleaoga (workshops /trainings), i aoga, faalapotopotoga faa-le-Ekalesia ma isi ituaiga faalapotopotoga i totonu o le afioaga.

5.1 Tulafono faa-le-nuu: Faasaina Faigafaiva le talafeagai:

Otootoga:

Ua maitauina pea e le afioaga le faaogaina pea e nisi o faifaiva o faigafaiva le talafeagai e aofia ai fanaia, ava niu kini ma vailaau oona. O nei faigafaiva, ua mautinoa le ogaoga o ona aafiaga i le faatamaia o se vaega tele o le gataifale, e pei o ia laiti ma figota aemaise o amu. A faaleagaina le alititai o lona uiga o le a leai ni i'a ma ni figota e toe maua ai. O le faaauauina pea o le faaogaina o nei faigafaiva, o le a umi lava se taimi e toe tau faaofi ai i lona tulaga lelei sa iai muamua.

Fuafuaga Faataatitia a le Afioaga:

Talu ai ona o le tulaga pagatia ua iai le gataifale o lenei nuu o Safaatoa o lea ua ae ai se finagalo autasi i le Komiti ua filifilia ina ia toe faamalosia tulafono a le afioaga sa faia i aso ua mavae e faasaina ai faigafaiva le talafeagai e pei o fanaia, ava niu kini ma vailaau oona. O le puipuiga ma le faamamaluina o nei tulafono o loo i aao lava o le pule mamalu a Alii ma Faipule faatasi ai ma le lagolagosua a tagatanuu o le afioaga.

Fautuaga:

Ia toe faamalosia ma faamamaluina tulafono ua taua i lalo a le afioaga mo le faasaina o faigafaiva le talafeagai.

Tulafono:

Ua matua faasaina faigafaiva le talafeagai e pei o fanaia, ava niu kini ma vailaau oona, ona toe faatinoina i gataifale o Safaatoa e amata mai i le tuaoi i sasae seia oo atu i le tuaoi i sisifo o le afioaga.

Faasalaga:

*Soo se tagata o le afioaga e solia lenei tulafono o le a faasalaina i le 5 aumatua poo le 5 pusa apa.
O tagata mai isi afioaga o le a molia i le Tulafono Autu Tau Faigafaiva ma Tulafono Laiti o Faigafaiva.*

Fuafuaga Faataatitia a le Ofisa o Faigafaiva:

O le a fesoasoani le Ofisa o Faigafaiva mo le faatinoina o fuafuaga faataatitia a le Afioaga e ala atu i lana polokalame fesoasoani mo aoga tau faigafaiva.

5.2 Ia faasalalauina Tulafono a le Afioga:

Otootoga:

O faasalalauina i leitio, televise ma nusipepa o nisi ia o auala talafeagai lelei e faalauteleina ai tulafono a le afioga. O le a silafia ai e le mamalu o le atunuu, malamalama ma manino lelei i le faatauina ma le puipuia o le siosiomaga o Safaatoa.

Fuafuaga Faataatitia a le Afioga:

Ua fautuaina e le Afioga ia faasalalauina tulafono, ua faamoemoe e faaagaaga mo le puipuiga o le siosiomaga o le gataifale ma lona tamaoaga. O le Komiti o le Faasao o le a latou faamaopopoina ma tapenaina faasalalauina o tulafono.

Autu o Faasalalauina: "Puipuiga o le gataifale o Safaatoa"

5.3 Ia Faasaina Upega ma Tili mata ninii:

Otootoga:

O le faaaogaina o upega ma tili mataninii ua maitauina le tele o i'a laiti ua faatamaia ai. Ua i ai le talitonuga o le a oo atu i se tulaga faaletonu i'a maua, pe a faaauuina pea le faaaogaina o nei ituaiga faigafaiva. O le a oo ina faaitiitia i'a e mafai ona oo atu lo latou lapopoa e maua ai le avanoa e fanafanau ma tautuufua ai.

Fuafuaga Faataatitia a le Afioga:

Na taua e le Komiti o le Faasao o le faaaogaina o nei metotia faafaigafaiva, o se tasi o mafuaaga ua faaitiitia ai i'a maua. O lea ua aiaia ai se tulafono e faasaina ai upega a tili mata ninii ona toe faaaogaina i fagotaga. Na faaalua foi e le afioga lo latou lagolagoina o tulafono o Faigafaiva ua iai nei, mo le faatapulaaina o mataupega laiti.

Tulafono Laiti:

Ua matua faasaina lava ona toe faaaogaina upega tatao e i lalo ifo o le 2 inisi (50 mm) ona mataupega faapea foi ma tili, ia le itiiti ifo i le 1.2 inisi (30 mm), i gataifale o Safaatoa.

Faasalaga:

*O tagata o le afioga e solia lenei tulafono o le a faia loa iai le finagalo a le Pule Mamalu a Alii ma Faipule.
Mo tagata mai isi afioga o le a molia sao i le Tulafono Autu Tau Faigafaiva, Tulafono Faatonutonu ma Tulafono Laiti.*

Fuafuaga Faataatitia a le Ofisa o Faigafaiva:

O le a lagolagosua mai le Ofisa o Faigafaiva e ala i lana Polokalame Fesoasoani. O le tuuina atu lea o faamatalaga e saga faamautu ma faamaopoopoina ai lenei tulafono.

5.4 Ia Faasaina Tuiga ma Faamoa:

Otootoga:

Ua maitauina, o se tasi lenei o ituaiga faigafaiva le talafeagai sa matua faaleagaina ai amu aemaise o i'a ma figota laiti i aso ua mavae, e ui lava e le o toe faatinoina i lenei vaiata. Peitai e iai le talitonuga, afai ae faaauuina nei ituaiga faigafaiva o le a sili atu ona tele se afaina o amu o loo fai ma ofaga o i'a ma

figota o le gataifale.

Fuafuaga Faataatitia a le Afioga:

Na faaalila e le afioga, e tatau ona toe faamautuina le tulafono e faasaina ai tuiga ma faamoa i gataifale o Safaatoa, aua sa mautinoa le matua faaleagaina ai o amu faapea isi meaola ninii o le gataifale i aso ua tuanai. Ua matua lagolagoina e le Komiti o le Faasao lenei manatu ma ua tuu faatasia ai loa lenei fuafuaga i le Tulafono o faigafaiva le talafeagai.

Tulafono:

Ua matua faasaina lava ni ituaiga faigafaiva e iai faamoa ona toe faatinoina i gataifale o lenei afioga o Safaatoa.

Faasalaga:

Soo se tagata o le afioga na te solia lenei tulafono, o le a faasalaina i le \$200. O tagata mai isi afioga o le a molia i le tulafono o Faigafaiva a le Malo.

Fuafuaga Faataatitia a le Ofisa o Faigafaiva:

O le a fesoasoani le Ofisa i le faamautuina ma le faamalositia o lenei tulafono. E lagolagoina foi e le ofisa so o se fuafuaga a le afioga ua talafeagai lelei ma le tulafono faa-le-malo mo le puipuia lelei o legataifale ma le siosiomaga.

5.5 Ia aoina mai i uta Alamea ma faatamaia ai:

Otootoga:

O le alamea o se ituaiga o le aveau ma e nofo i luga o le aau, na te aina meaola niniua taua o polipe o loo ola i amu. A oo ina faateleina, ona latou faatamaiaina lea o se vaega tele o le aau, ma oo atu ai i se tulaga pagatia. O le a aafia ai le tele o meaola o loo faalagolago i le aau mo nofoaga ma meaai. E le mafai ona vaevaeina le alamea i le sami aua e mafai ai e nei itutino ona faatupuina nisi alamea fou.

O se auala e mafai ona tapeina ai lenei meaola o le aoina lea i uta e faamamago i le la, pe tanuia. E mafai ona faaogaina lenei meaola o se faalelei eleele mo faatoaga ma mea-toto.

Fuafuaga Faataatitia a le Afioga:

Na taua e le afioga, o le alamea o se tasi lea o faafitauli o aliaie mai lona tulaga ogaoga. E fai o le faatamaiaina o amu, ao le aafia ai foi o le soifua o tagata fagogota, ma ua ae aise manatu ina ia fatulagaina ni fofo o lea faafitauli.

Fautuaga:

Ua fautuaina e le afioga le au-tautai uma ina ia aoina i uta alamea pe a vaia i gataifale i taimi o fagotaga mo le faatamaiaina.

Fuafuaga Faataatitia a le Ofisa o Faigafaiva:

E leai se polokalame a le Malo ua fuafuaina mo le faatamaiaina o le alamea, vagana ai ni fautuaga e ala atu i Pepa o Faamatalaga ua maea ona saunia e le Ofisa o Faigafaiva, i auala talafeagai e tineia ai lenei meaola faalafua.

5.6 Ia Faasaina ona toe lafoai lapisi i le Matafaga ma le Sami:

Otootoga:

O le lafoai o otaota i le sami ma matafaga o le a avea ma nofoaga e tautuufua ai namu ma pipisi ai faamai e aafia ai le soifua maloloina. E le gata i lea ae o nisi o lapisi e pei o atigi apa ma atigi fanu, e faamanualia ai aao o le au faifaiva, aemaise o le aafia ai o nofoaga o loo tautuufua ai meaola o le gataifale.

O le foia o nei faafitauli, o le eliina lea o se lua e lafoai uma iai otaota a le afioaga atoa. Talu ai e mafai ona tafe ma ulu atu le oona o otaota, lapisi ma vailaau e lafoaina i le lua, o lea e fautuaina ai le eliina o nei lua ia taumamao ese mai puna-vai ma le sami.

Fuafuaga Faataatitia a le Afioaga:

Ua lagolagoina e le afioaga le fuafuaga a le Malo mo le aoina o lapisi, e ala lea i le fausiaina o ni fata lapisi. O lenei fuafuaga ua malu puipuia lelei e Alii ma Faipule aemaise o tagatanuu o Safaatoa.

Tulafono:

Ua matua faasaina o toe lafoai lapisi e iai pepa iila, atigifagu, atigiapa ma isi lava ituaiga lapisi i gataifale o Safaatoa.

Faasalaga:

*Mo tagata o le afioaga e solia lenei tulafono, o le a faasalaina i le \$200.
O tagata mai isiafioaga.*

Fuafuaga Faataatitia a le Ofisa o Faigafaiva:

O faamatalaga eseese e faatatau i aafiaga o le siosiomaga o le gataifale ma lona tamaoaiga, o le a fesoasoani iai le Ofisa o Faigafaiva e aotauina le afioaga i le taua ole teu maluina o lapisi ma otaota i nofoaga talafeagai.

5.7 Ogasami Faasoina:

Otootoga:

Na faailoa e le afioaga o le faia o se ogasami faasoina o le malu puipuia lea o le siosiomaga o le gataifale ma lona tamaoaiga e ala i i'a ma figota. O lenei foi vaega e le mafai ona toe aafia i ni fagotaga a le afioaga ma fafo atu. O le autu ma le faamoemoe o lenei faasao o le toe fateleina ma le toe faatupulaia o i'a ma figota i le gataifale, ma ia maua e nei meaola se avanoa e tautuufua ma fanafanau ai. E mafai foi e lenei faasao ona toe faaleleia nisi o vaega o le gataifale ua afaina e pei o amu ma le aau. O le a le pine ona manuia si o tatou atunuu aemaise tupulaga o le lumanai.

Fuafuaga Faataatitia a le Afioaga:

O le a filifilia lava e le afioaga se vaega o le gataifale e faasoina. O le a latou fausiaina foi se tulafono e faasaina ai ni fagotaga i totonu o lea nofoaga. O le afioaga foi latou te faamalosi nei tulafono ma mataituina le tausiga ma le vaai lelei o le nofoaga faasao mo i'a ma figota.

Tulafono:

Ua matua faasaina lava soo se tagata ona faatinoina soo se ituaiga o faiva i totonu o le nofoaga faasoina mo i'a m figota. Ua faasaina ni taelega pe kolosiina foi e se vaa-fagota le nofoaga faasao o lenei afioaga.

Faasalaga:

*Soo se tagata o le Afioaga e solia lenei tulafono, o le a faasalaina i le \$500.
O tagata mai isi afioaga, o le a molia sao i le Tulafono Laiti o Faigafaiva.*

Fuafuaga Faataatitia a le Ofisa o Faigafaiva:

Ua faamaoti mai e le Ofisa o Faigafaiva le faatinoina o ni iloiloga mo se vaega o le gataifale e tatau ona faasaoina. O le a latou saunia ni lipoti mole tuuina aloaia atu i le Komiti o le Pulega o Faigafaiva. E le gata i lea ae o le a tuuina atu foi ni fautuaga mo le tausiga, pulea male vaaia lelei o lea nofoaga.

5.8 Tufaina atu ma Faafaatoagaina nisi figota:

Otootoga:

O nei i'a ma figota o lo o aumaia i fafo, o le a fuafua foi lona tufaina atu i ogasami talafeagai lelei mo i latou. O nisi nei o atinae ua mautinoa le faatupuina ai o i'a ma figota mole fofoga taumafa o le afioaga.

O le lelei ma le alualui luma o lenei atinae, e moomia ai lava le galulue filiga ma le faamaoni ole afioaga ina ia taunuu i se taunuuga lelei ma manuia. Sa taua foi e vaega taitasi, o nisi o figota sa maua i lo latou gataifale ua tauau ina mou atu. O lea ua latou faatalosagaina ai nisi o figota e faafaatoagaina i lo latou gataifale.

5.9 Ia unaia Faigafaiva i tuaau ma aoaoga mo faigafaiva:

Otootoga:

E mafai ona faalelei le tamaoaiga o i'a ma figota maua i aloalo, aau ma gataifale ua faaleagaina, pe a fai ae faaititia le fagotaina o nei vaega o le gataifale. O se tasi o auala e faaleleia ai le tamaoaiga o le gataifale, o le fagotaina lea o ogasami e lei fagotaina lava, aemaise o tuaau mamao.

Fuafuaga Faataatitia a le Afioaga:

Ua iai le talitonuga i le komiti e ao ona unaia ma faamallosia faigafaiva i tuaau ma aau mamao ina ia tuumamaina ai le fagotaina o i'a ma figota o aau ma le aloalo. Ua le gata foi i lea ae o le a mafai ai ona toe faatupulaia ma faleleia le tamaoaiga o le tele o vaega o le gataifale, aemaise i le aloalo ua faaleagaina. Ua talosagaina foi le Ofisa ina ia faatinoina se aoaoga i auala tau faigafaiva e aoaoina ai le autautai o le nuu ma ia faautaitaia e se alii ofisa o loo iai le tomai faapitoa i mea tau faigafaiva.

Fuafuaga Faataatitia a le Ofisa o Faigafaiva:

Talu ai ona le tele o nuu e leai ni vaa e talafeagai mo fagotaga i tuaau, o lea ua taumafai ai le ofisa e saili fesoasoani mo se auala ina ia faigofie le mauaina o ni vaa talafeagai mo lea faamoemoe. O le a iloiloina foi e le ofisa o manaoga i auala e aoaoina ai le mamalu o le autautai o le afioaga.

E aofia ai i nei aoaoga le teuina ma le vaaia lelei o i'a i luga o le vaa, saogalemu o le aufaifaiva i luga o le sami, tausiga o afi o vaa, faaasuina o i'a, ma isi lava mataupu taua.

5.10 Mana o Talosaga:

Otootoga:

O talitonuga ma talosaga tuufaatasi-faalelotu ua talitoniaina ma mautinoa lona taua aua le puipua ma le faasaogalemuina o le siosiomaga o le gataifale ma lona tamaoaiga.

Fuafuaga Faataatitia a le Afioaga:

O le sao taua o le aufailotu, o le unaia ma faamallosiau i tagatanuu latou te faatauaina le puipua ma le faasaoina o le gataifale. E taua tele lenei fuafuaga e tuufaatasia ai finagalo o tagata ina ia galulue faatasi e foia faafitauli o loo aliae mai i le siosiomaga o le gataifale.

Ua lagolaogina foi e le komiti lenei fautuaga, ma fautuaina ai le mamalu o le afioaga ina ia galulue faatasi ma le aufailotu i le faailogaina o le aso talosaga ma anapogi a si o tatou Malo i tausaga taitasi. O le a talosia ai laufanua, gataifale, aemaise o tagatanuu o le afioaga.

Fuafuaga Faataatitia a le Ofisa o Faigafaiva:

O le a tuuina atu ni fesoasoani a le Ofisa mo le mamalu o le aufailotu e ala i Pepa o Faamatalaga ma tautalaga ina ia fesoasoani i le tapenaina o a latou lauga ma aoaoga mo le puipuia ma le faasaoina o le siosioaga o le gataifale ma lona tamaoaiga.

6 TALOSAGA

6.1 Talosaga a le Afioga:

O nei talosaga sa mafai ona tuuina mai e sui o le afioga sa auai i fonotaga ma le Ofisa o Faigafaiva i taimi o faatalatalanoaga i vaega e tolu. O talosaga uma na tuuina mai sa faamautuina e le Komiti o le Faasaoi le latou fonotaga ma le Ofisa. Pe a talafeagai ai, o nei talosaga o le a mafai ona iloiloaina e le Ofisa o Faigafaiva mo le faataunuuna ma le taliaina o lenei tusi e le Pule Mamalu a Alii ma Faipule i le fono tele. O talosaga uma sa tuuina mai o loo faailoa atu i lalo.

- Ogasami Faasao o l'a ma Figota
- Faisua
- Tilapia
- Nisi figota
- Aoaoga tau faigafaiva

7 TOE ILOILOINA O LENEI FUAFUAGA TATAU

Otootoga:

O le toe iloiloaina o le Fuafuaga Tatau o le Faasao o l'a ma Figota a le afioga ma lona agai i luma atoa ma lona toe suesueina ina ia toe suesueina ina ia toe faailoa ai le taua ma le aoga o lenei polokalame i totonu o nuu ma afioga, aemaise se auililiga maumaututu i le tulai mai o galuega fai a le afioga ma le Ofisa o Faigafaiva ile faataunuuna o Fuafuaga Faataatitia. O lenei iloiloaga e lipotia ai le sologa lelei o le Polokalame, ae o a foi ni faaletonu o tulai mai ai talu ona faavaeina i totonu o le afioga.

Fuafuaga Faataatitia a le Afioga ma le Ofisa o Faigafaiva:

Ua iai le malilliega a le Komiti o le Faasao a Safaatoa ma le Ofisa o Faigafaiva, ina ia toe auililiina lenei Fuafuaga Tatau pe a maea le ono (6) masina talu ona pasia lenei tusi i le Fono Tele i le aso 10 Tesema 1997. O le a toe feutgai le Komiti ma le Ofisa i se aso o le a atofaina pe a atoa le 6 masina.

SUI AUAI O LE AFIOAGA (FAATALATALANOAGA I VAEGA)

Vaega Matai:	Masina Tautasi	Finau Faamatala	Tuala Matala
	Sotogi Lotomau	Tausili Tanielu	Namuasu Joe
	Tualoina Tini	Vaatoa Faamata	Lauama Faufua
	Tiamalie Sio	Finau Tua	Fiaui Sefo
	Fiaui Faafeu	Tuala Sola	Finau Pausisi
	Vaatoa Leona	Tafa Fono	Tualoina Alofa
	Loloa Maa	Feo Otele	Fiauvaa Ausage
Vaega Tina:	Sasa Tini	Aufaatasi Joe	Tulipe Finau Faamatala
	Soifua Povave	Tina Povave	Asomaila Finau Pausisi
	Tala Sotogi	Faulalao Solofa	Tamila Tia Povave
	Leafa Masina	Aso Muai	Olive Masina Tautasi
	Siu Lanama	Laumua L. Maa	Aiga Liu
	Silafaga Povave	Velia Pisi	Motiana Ioselani
	Ponesi Ah Hoing	Fuataina Tasi	
Vaega Aumaga:	Iona Masina	Ioselagi Tafa	Siuai Fiaui

Loma Finau	Fereti Sotogi	Miki Tuala
Siulepa Aiulu	Oto Oto	Enele Muai
Sitivi Liu	Folasa Fiaui	Iese Seu
Alatina Tuala	Elika T. Tasi	Tasi Tini
Farani Loto	Solomona Tafa	Niko Tini
	Loi Tuala	

Komiti Matai:

Tuala Faamatala	Fiauvaa Sefo	Finau Tua
Tafa Fono	Tumua Toe	Muaiava Faatoia
Namuasu Teueni	Lauama Faofua	Feo Otele

Komiti Tina:

Somaile Finau	Tala Iese	Laumua Loavaegogo
Faulaloo Tafa	Leafa Iona	Togi Tafa
Aiga Liu Tuala	Pepe Tini	

Komiti Aumaga:

Iese Seu	Kitiona Muaava	Ioselani Tafa
Iona Masina	Sene Afualo	Tafili T Pouvave
Tavita Samuelu	Sofara Finau	Iose Lemalu
Solomona Tafa		

O nisi nei o le Komiti o le Faasao o le Gataifale na auai i le Fonotaga i lea aso.



**Laina i Tua : Tafā Ta'amū, Tafā Fono, Fiaui Va'a Sefo
Laina i Luma : Finau Tu'ua, Finau Ufiufi**